

ITALIAKO GIROA. Mendiko lehen etapan Pantani eta Savoldelli ahul agertu dira, eta Olano onenekin iritsi da

Lehen azterketa gainditu du Olanok

Rik Verbruggek ezin izan zion eutsi onenen erritmoari, eta Frigok du orain elastiko arrosa



CARLO FERRARO / EPA

Marco Pantani atzoko helmugara hurbiltzen. Mercatoneko buruak minutu erdi galdu zuen Di Luca irabazlearen aldean.

Erredakzioa | **DONOSTIA**

Mendiko lehen etapak beti sortzen du kezka txirrindularien gain, besteekiko indarrak nola dauden neurtzeko aukera aproposa izaten baita. Atzo Montegervinen ikusitakoaren arabera, Danilo Di Luca da une honetan indartsuena, Simoni, Garzelli eta Frigorekin batera, Abraham Olano itxaropentsu izateko moduan da, eta Savoldelli eta Pantani uste baino ahulago daude. Dena den, horrek guztiak ez du argibide handirik ematen, mendiko lehen etapa baino ez baita. Etapa erabakigarriak azken astean etorriko dira, eta ordurako indarren alderaketa erabat aldatuta egon daiteke. Baina atzo, behintzat, Danilo Di Luca eta Dario Frigo izan ziren etapari etekin handiena atera ziotenak, bata bigarren garaipena lortu zuelako, eta besteak lidergoa kendu ziolako Rik Verbruggeri. Lottokoari gogorregia egin zitzaion ibilbidea, eta lau minututik gora galdu zituen helmugan.

Etapako lehen kilometroetan izaniko ihesaldi saioek ez zuten arrakastarik izan. Tropelak bat eginik egin zuen ibilbideko lehen zatia, baina hirugarren mailako Celzi mendateko maldetan gora hasi zirenean Rik Verbrugge liderrak ahuldadea erakutsi zuen, aurreko egunean izaniko erorikoaren eraginez.

Montegervineko igoerara faborito guztiak batera iritsi ziren. Malkar handirik ez duen arren, 17,5 kilometroko igoera gogorra egiten da amaierarako. Helmugarako hamar kilometro falta zirela, Alessio taldeak erritmoa bizitu zuen, ea 40 txirrindulariz osaturiko taldea gelditu zen lasterketa buruan. Ordurako Rik Verbrugge liderra atzean zen. Azken txanpan Di Luca, Gottik eta Garzelli ekin zioten erasoan, eta hor Savoldelli eta Pantani erritmoari eutsi ezinik gelditu ziren. Savoldellik bi minututik gora galdu zituen, eta Pantanik minutu erdia. Olano onenekin sartu zen, kostata izan bazen ere. Gaur etapa laua dute.

ZITU BIZIAN

■ **Xabier Usabiaga**

Lehen eguneko ajeak

Edozein lanetan beti izan ohi da bereziki gogorra estreinako eguna, eta ziklismoa ez da salbuespena. Jakina denez, Giroak, mendian amaituko diren hiru etapetatik lehenbizikoa izan zuen atzo, eta ziklista hainbati aje gehiegi antzeman zitzaion, ustekabea. Arrazoiak desberdinak eta anitz izan daitezke.

Batzuek litekeena da zailtasunak izatea ordekatik mendirako aldaketan. Desarrolla diferenteak erabiltzen dira batean zein bestean, pedaleoaren kadentzia ere moteldu egiten da, eta gorputzaren exigentzia, aldiz, hazi. Guztiak ez dute egoera horretara bat-batean egokitzeko erraztasun bera, eta, segur aski, arrazoi honen adibiderik onena ibanesto.com taldeko Leo-

nardo Piepoli da; atzo minutu eta erditik gorako atzerapena izan zuen eskalatzaile italiarra, alegia. Piepolik bigarren postuan amaitu zuen Trentino Giroa orain gutxi (hilaren hasieran) Francesco Casagrandaren atzetik; hortaz, sasoi bikainean da, eta bere ibili eskasa arrazoitzeko ez zait beste argumenturik bururatzen.

Litekeena da, besteak beste, Abraham Olanoren zailtasunen iturburua ere (aurreko tropeltxoan igo zen, baina estu eta larri) hori izatea, ez baita gauza bera gertatzen zaion lehenbiziko kasua. 1996an, Giroa hirugarren amaitu zuen hartan, ez zen lehen hamarren barruan sailkatu mendian amaitu zen estreinako etapen (Monte Sirino), baina handik

aurrerako mandatetzar guztietan aurreneko seietan helmugaratu zen. Horrenbestez, baikorrek badute itxaropena izateko argi printza bat, baina ezkorrek, ur txikietan larritzen dena, handietan ito egiten dela esango dute.

Beste batzuen hutsegitea, berriz, presatuta eskasiak adieraz dezake, eta, Marco Pantani izan daiteke hori azaltzeko adibiderik egokiena. Mercatone Unokoak bizpahiru karrera baino ez ditu amaitu aurtengo denboraldian, eta, beharbada, gorputzak ez dio nahi bezala erantzun garai bateko pedalkada arin bizia eskatu diotenean. Hori hala bada, ez du oraindik etsitzeko motiborik, egunek aurrera egin ahal sasoia gorantz egingo baitio italiarrari, eta azken aste erabakigarrian aurkariak menderatzeko lain izan baitaiteke. Bere ahuldadearen arrazoiak besteren bat bada, orde, komeriak izango ditu bere xedea erdiesteko.

SAILKAPENAK

LAUGARREN ETAPA

1. Danilo Di Luca (Cantina)	4:34:12
2. Gilberto Simoni (Lampre)	d.b.
3. Stefano Garzelli (Mapei)	d.b.
4. Giuliano Figueras (Panaria)	d.b.
5. Davide Rebellin (Liquigas)	3ra
12. Unai Osa (IBanesto.com)	d.b.
18. Abraham Olano (ONCE-Eroski)	9ra

NAGUSIA

1. Dario Frigo (Fassa)	17:21:19
2. Abraham Olano (ONCE-Eroski)	12ra
3. Gilberto Simoni (Lampre)	13ra
4. Wladimir Belli (Fassa)	17ra
5. Jose Azevedo (ONCE-Eroski)	19ra